

15

ԴԵԿՏԵՄԲԵՐԻ
2021



Luys



Linyu®

2017-2021ԹԹ. ԸՆԹԱՑՔՈՒՄ ՀՀ ԵՐԵՔ

**ԿԱՌԱՎԱՐՈՒԹՅՈՒՆՆԵՐԻ ԾՐԱԳՐԱՅԻՆ ԴՐՈՒՅԹՆԵՐՈՎ
ԻՐԱԿԱՆԱՑՎԱԾ ԱՇԽԱՏԱՆՔՆԵՐԻ ՀԱՄԵՄԱՏՈՒԹՅՈՒՆ**

**ՓՈՔՐ ԵՎ ՄԻՋԻՆ
ՁԵՌՆԱՐԿԱՏԻՐՈՒԹՅԱՆ ԵՎ ԳՈՐԾԱՐԱՐ
ՄԻՋԱՎԱՅՐԻ ԲԱՐԵԼԱՎՈՒՄ**



Երկրի տնտեսության զարգացման գործում կարևոր նշանակություն ունի այն միջավայրը, որը ձևավորվել է բիզնեսի գործունեության և դրա զարգացումն ապահովելու համար: Հայաստանի անկախության տարիներից ի վեր կառավարությունները ձեռնարկել են տնտեսական, սոցիալական և իրավական բարեփոխումներ, որոնց նպատակներից էր նաև գործարարության զարգացումը երկրում: Այս բարեփոխումները և կատարված քայլերը նպաստել են գործարար միջավայրի ձևավորմանը և դրա զարգացմանը: Սակայն այդ գործընթացը պետք է կրի շարունակական բնույթ՝ հաշվի առնելով երկրի տնտեսական զարգացման վրա ազդող բազմաթիվ, այդ թվում՝ արտաքին տնտեսական գործոնները: Դրանով է պայմանավորված գործարար միջավայրի բարելավմանն ու զարգացմանն ուղղված քաղաքականության և ծրագրային դրույթների առկայությունը կառավարությունների ծրագրերում:

Փոքր և միջին ձեռնարկատիրությունը (ՓՄՁ) կարևոր դերակատարում ունի երկրի տնտեսական զարգացման գործում: Ըստ 2018թ. տվյալների՝ ՓՄՁ-ները կազմում են տնտեսության գործարար հատվածի բոլոր ձեռնարկությունների ավելի քան 99.8%-ը, որտեղ գերակշիռ մաս են կազմում միկրոձեռնարկությունները: ՓՄՁ-ներին է բաժին ընկնում գործարարության ոլորտում ընդհանուր զբաղվածության 68%-ը, և ՓՄՁ-ներն են ստեղծում բիզնես հատվածի ավելացված արժեքի մինչև 60%-ը: Ակնհայտ է, որ ՓՄՁ ոլորտի զարգացումը, փոքր և միջին ձեռնարկատերերի աջակցությունը և նրանց գործունեության խրախուսումը պետք է լինեն պետության մշտական ուշադրության կենտրոնում:

Սույն փաստաթուղթը հանդիսանում է «2017-2021թթ. ընթացքում ՀՀ երեք կառավարությունների ծրագրային դրույթներով իրականացված աշխատանքների համեմատություն» շարքի երկրորդ վերլուծական նյութը՝ ներկայացնելով գործարար միջավայրի բարելավմանը և ՓՄՁ ոլորտի զարգացմանն ուղղված երեք կառավարությունների ծրագրային դրույթները և դրանց իրականացման նպատակով ձեռնարկված քայլերը: Ինչպես և մյուս վերլուծություններում, ուսումնասիրվել է միայն տվյալ կառավարության գործունեության ժամանակահատվածի համար նախատեսված քայլերը և կատարված աշխատանքները: Մինչ այս, արդեն իսկ հրապարակվել են ԵՄ և ԵԱՏՄ հետ տնտեսական համագործակցության ուղղությամբ երեք կառավարությունների ներկայացրած ծրագրային դրույթների իրականացման վերաբերյալ վերլուծությունները:

ՄԱՍ I. ԳՈՐԾԱՐԱՐ ՄԻՋԱՎԱՅՐԻ ԲԱՐԵԼԱՎՈՒՄ

ՀՀ կառավարության ծրագիր 2017-2022թթ.	ՀՀ կառավարության ծրագիր 2019-2024թթ.	ՀՀ կառավարության ծրագիր 2021-2026թթ.
1. Գործարար միջավայրի բարելավման տարեկան ծրագրերի իրականացումը հետևողականորեն շարունակելու նպատակով ՀՀ կառավարությունը նախատեսում է՝ Մինչև 2017 թվականի ավարտն ապահովել բնապահպանական և բնօգտագործման հաշվարկ-հաշվետվություններն ամբողջությամբ էլեկտրոնային եղանակով ներկայացնելու կարողությունները՝	- Տնտեսական քաղաքականության որակի և գործարար միջավայրի վրա դրա ազդեցության գնահատականները դիտարկվելու են միջազգայնորեն ընդունված և ճանաչում ունեցող ընդհանրական ինդեքսների միջոցով: Մասնավորապես, օգտագործվելու են Համաշխարհային տնտեսական ֆորումի Գլոբալ մրցունակության ինդեքսը և Ներառական զարգացման ինդեքսը, Համաշխարհային բանկի՝ «Գործարարությամբ զբաղվելը» զեկույցի գնահատումը և այլն: - Ենթակառուցվածքների հասանելիության սահմանափակումները չպետք է ստեղծեն այնպիսի իրավիճակ, երբ տնտեսավարողների միջև կարող են ստեղծել անհավասար մրցակցային պայմաններ:	- Գործարար և ներդրումային միջավայրի բարելավման համար կառավարությունը քայլեր է ձեռնարկելու արժեթղթերի նոր շուկաներ ստեղծելու ուղղությամբ: - Աջակցություն է տրամադրվելու ընկերություններում արդիական կորպորատիվ կառավարման համակարգերի ներդրման և լրացուցիչ խթանների միջոցով այդ ընկերությունների զարգացման համար: - Բարելավվելու է աշխատանքային օրենսդրությունը, մասնավորապես գործատու-աշխատող պայմանագրային հարաբերությունների այնպիսի կարգավորումներ կսահմանվեն, որոնք նպաստում են և՛ բիզնեսի, և՛ մասնագետի կայուն զարգացմանը: - Պարզեցվելու են բարձր որակավորում կամ հատուկ գիտելիքներ ունեցող օտարերկրյա մասնագետների ներգրավման ընթացակարգերը: - Ներդրողների համար ապահովվելու է տնտեսական ենթակառուցվածքների առավելագույն հասանելիություն:

ամբողջականացնելով հարկային հաշվետվություններն էլեկտրոնային եղանակով ներկայացնելու համակարգը. - մինչև 2017 թվականի ավարտը կրճատել էլեկտրականության միացման գործընթացում պահանջվող գործողությունները: 2. Տնտեսական մրցակցության պաշտպանության մեխանիզմների կատարելագործման նպատակով կառավարությունը նախատեսում է՝ - մինչև 2017 թվականի ավարտն ապահովել գերիշխող դիրքի չարաշահում որակելու դեպքերի օրենսդրական հստակեցում:	Կարգավորումների հստակեցումը և դրանցով պահանջվող՝ ժամանակային և ֆինանսական ծախսերի առավելագույն կրճատումը պետք է լինի այս ուղղությամբ կառավարության գերակայություններից մեկը: - Կարևոր հարց է նաև շինարարական թույլտվությունների ստացումը: Նշված ընթացակարգերին առնչվող կազմակերպությունների և պետական կառույցների գործառույթների հստակեցումը լինելու է այս ուղղությամբ կառավարության հիմնական թիրախներից մեկը: - Բիզնեսի զարգացման էական խոչընդոտ է այն իրողությունը, որ Հայաստանում անվճարունակության (սնանկացման) վարույթների ճնշող մեծամասնությունն ավարտվում է ձեռնարկությունների լուծարմամբ: Կառավարությունը կարևորում է իրավիճակի շրջադարձային փոփոխությունը, խրախուսելու է այնպիսի օրենսդրական և ինստիտուցիոնալ փոփոխությունները, որոնց արդյունքում անվճարունակության վարույթներում հայտնված կազմակերպություններն ավելի հաճախ պետք է հասնեն ֆինանսական առողջացման և պահպանեն գործելու հետագա իրավունքը:	Համաձայն կառավարության սահմանած կարգի՝ այս նպատակի համար 5 տարվա ընթացքում տրամադրվելու է առնվազն 50 մլրդ դրամ: - Նորարարական աջակցության գործիքակազմի միջոցով չեզոքացվելու են տնտեսությունում առկա ռիսկերը՝ տնտեսական բարդություն ապահովող ներդրումային ծրագրերի համար: - Մասնավոր հատվածում գիտահետազոտական աշխատանքները, գյուտարարությունն ու նորարարությունը խրախուսելու նպատակով ստեղծվելու են արտոնագրված գյուտերի առևտրայնացումից ստացվող եկամուտների հարկման առավել խրախուսող մեխանիզմներ: - Իրականացվելու են շուկայական ուսումնասիրություններ՝ թիրախավորելով ներդրումային գրավչության և ծրագրերի մշակման համար առանցքային տեղեկատվության բացահայտումը: Ուսումնասիրությունները համատարած հասանելի կլինեն Հայաստանի և օտարերկրյա ներդրողների համար՝ ապահովելով ներդրումային որոշումների կայացման արագացումը: - Մշակվելու է թվային տնտեսության հայեցակարգը՝ թիրախավորելով տնտեսավարողների թվային կարողությունների զարգացումը, թվային տնտեսության համար առանցքային ենթակառուցվածքների հասանելիության և որակի բարձրացումը, ինչպես նաև տեղեկատվության հասանելիությանը առնչվող կարգավորումների ճկունությունը: - Մշակվելու է մտավոր սեփականության ոլորտի զարգացման ռազմավարությունը՝ ստեղծագործական և ներդրումային բարենպաստ միջավայր ստեղծելու, մտավոր սեփականության իրավունքի արդյունավետ և հուսալի
---	--	---

		պահպանություն և պաշտպանություն ապահովելու նպատակով: Հայաստանի տնտեսության մեջ կանանց և երիտասարդների ազդեցությունը բարձրացնելու նպատակով իրականացվելու են միջազգային շուկաներում վերջիններիս գործարար կապերի և մրցունակ կարողությունների զարգացմանն ուղղված ծրագրեր:
--	--	---

2018 թվականին տեղի ունեցած իշխանափոխության գործընթացն ուղեկցվում է գործարար միջավայրին առնչվող սուր քննադատությամբ և բոլորի համար հավասար տնտեսավարման հնարավորությունների ստեղծման, ներդրումների և տնտեսական աճի խոստումներով: Սակայն ի՞նչ է իրականում կատարվել, և ի՞նչ արդյունքների են հասել վերջին երեք կառավարությունները:

2017 թվականի կառավարությունը ամբողջությամբ իրականացրել է գործարար միջավայրի բարելավման ուղղությամբ 2017 թվականի համար նախատեսված աշխատանքները: Այսպես, 2017 թվականի դեկտեմբերին ՀՀ պետական եկամուտների կոմիտեն հայտարարեց բնապահպանական և բնօգտագործման վճարների հաշվարկ-հաշվետվությունները էլեկտրոնային եղանակով ներկայացնելու հնարավորության մասին¹: Նույն տարեթվին իրականացված բարեփոխումների արդյունքում դյուրացվեց նաև էլեկտրականության միացման գործընթացը, ինչը ներկայացված է նաև «Գործարարությամբ զբաղվելը» 2018 թվականի զեկույցում²:

«Տնտեսական մրցակցության պաշտպանության մասին» ՀՀ օրենքում 2017 թվականի դեկտեմբերի 8-ին կատարված փոփոխությամբ հստակեցվեցին նաև գերիշխող դիրքին առնչվող օրենսդրական կարգավորումները:

Տրված խոստումների կատարում չի կարելի, սակայն, վերագրել 2019 թվականի կառավարությանը: COVID-19-ի համավարակի պատճառով 2021 թվականին «Doing Business» զեկույցը չի հրապարակվել, իսկ համաձայն 2020 թվականի զեկույցի (հրապարակված է 2019թ. հոկտեմբերին)³ Հայաստանը գտնվում է 47-րդ հորիզոնականում՝ զիջելով Վրաստանին

¹ <https://petekamutner.am/mdNews.aspx?sid=src&nid=4639>

² <https://www.doingbusiness.org/content/dam/doingBusiness/media/Annual-Reports/English/DB2018-Full-Report.pdf>

(7-րդ հորիզոնական), Ղազախստանին (25-րդ հորիզոնական), Ռուսաստանին (28-րդ հորիզոնական), Թուրքիային (33-րդ հորիզոնական), Ադրբեջանին (34-րդ հորիզոնական): Հաշվի առնելով, որ 2020 թվականի ընթացքում COVID-19-ի, այնուհետև նաև պատերազմի պատճառով պետական կառավարման համակարգը բնականոն չի գործել, հաջորդ զեկույցում Հայաստանի դիրքի առաջխաղացում ակնկալելը իրատեսական չէ: 47-րդ հորիզոնականը չի բնութագրվում նաև գործարար միջավայրի դրական փոփոխությունները:

Էլեկտրականության, գազի և ջրի օգտագործման թույլտվությունների միացման և քաղաքաշինական թույլտվությունների ստացման ժամանակային և ֆինանսական ծախսերի կրճատման ուղղությամբ որևէ տեսանելի քայլ չի իրականացվել: Ավելին, «Էլեկտրականության միացման» ցուցիչով Հայաստանը հետընթաց է գրանցել Համաշխարհային բանկի «Գործարարությամբ զբաղվելը 2020» զեկույցում՝ նախորդ տարվա 17-րդ տեղից իջնելով 30-րդ տեղ:

Սնանկության գործընթացի արդյունավետության բարձրացման, այդ թվում՝ ֆինանսական առողջացման դեպքերի ավելացման համար հիմքերի ստեղծման նպատակով դեռևս 2017 թվականի կառավարության կողմից սկսվել էր «Սնանկության մասին» ՀՀ օրենքի և հարակից օրենքների նախագծերի փաթեթի մշակման գործընթացը: Ու թեև այդ փաթեթը դեռևս 2019 թվականին ներկայացվել էր ՀՀ Ազգային ժողով, այն մինչ օրս չի ընդունվել: Հետևաբար այս խոստումը ևս չի կատարվել:

2017 և 2019 թվականների կառավարությունները մշակել են նաև գործարար միջավայրի բարելավման միջոցառումների տարեկան ծրագրեր (2017 և 2019 թվականների համար), ինչպես նաև միջոցառումների եռամյա ծրագիր 2020-2023 թվականների համար: Բոլոր դեպքերում էլ, սակայն, բացակայում է այդ ծրագրերի իրականացման թափանցիկությունը և հրապարակայնությունը: Ճիշտ է, ըստ միջոցառումների ծրագրերի, բոլոր պատասխանատու մարմինները պարտավոր են դրանց իրականացման մասին հաշվետվություններ ներկայացնել էկոնոմիկայի նախարարություն, իսկ վերջինս՝ ՀՀ կառավարություն (ի դեպ, 2017 թվականի ծրագրով դա պետք է արվեր եռամյա պարբերականությամբ, իսկ հաջորդ տարիների ծրագրերով՝ ամենամյա պարբերականությամբ), սակայն դրանց արդյունքները այդպես էլ չեն հրապարակվում:

2019 թվականի կառավարության գործունեությունն աչքի է ընկնում նաև գործարար համայնքի հետ շփումների ցածր մակարդակով և փոքր ու միջին ձեռնարկատերերի հարցերի քննարկման հետաքրքրության բացակայությամբ:

Այսպես, թեև 2020 թվականի օգոստոսին ՀՀ կառավարությունն ընդունեց «Փոքր և միջին ձեռնարկատիրության զարգացման 2020-2024 թվականների ռազմավարությունը և դրանից բխող 2020-2022 թվականների գործողությունների

ծրագիրը հաստատելու մասին» ՀՀ կառավարության որոշումը, սակայն ոչ մինչ այդ որոշման ընդունելը և ոչ էլ դրանից հետո, մինչև 2021 թվականի փետրվարը չեն կայացել ՀՀ կառավարության և ՎՋԵԲ-ի համատեղ նախաձեռնությամբ ստեղծված Փոքր և միջին ձեռնարկատիրության զարգացման խորհրդի նիստեր: Խորհրդի նիստը կայացել է միայն 2021 թվականի փետրվարի 19-ին՝ 2017 թվականի հուլիսի 7-ին կայացած վերջին նիստից գրեթե երեք տարի անց:

2020 թվականին COVID-19-ի համավարակի բռնկումը և դրանով պայմանավորված սահմանափակումներն ավելի բարդացրին գործարար համայնքի վիճակը: Կառավարության կողմից մշակված աջակցության միջոցառումները ընդհանուր առմամբ չէին ծառայում իրենց նպատակներին, տնտեսական մասով հիմնականում վարկերի տեսքով էին, որոնք, մեծ հաշվով, բիզնեսին աջակցելու անվան տակ միտված էին բանկային համակարգի կայունության պահպանմանը և ոչնչով չէին թեթևացնում բիզնեսի բեռը:

COVID-19-ի հետևանքները չեզոքացնող միջոցառումների ուսումնասիրությունից կարելի է փաստել, որ դրանք հիմնականում լավ չհաշվարկված և հապճեպ են եղել՝ հաշվի չառնելով հետագա հնարավոր զարգացումները: Այս ամենը ավելի է բարդացրել գործարար համայնքի վիճակը և գործարար միջավայրը:

Գործարար միջավայրի բարելավմանն ուղղված նոր կառավարության ծրագրային որոշ դրույթներ դեռևս անհասկանալի են և հետագայում նույնիսկ ոչ չափելի: Այսպես, անհասկանալի է, թե ինչպիսի ծրագրեր է նախատեսում կառավարությունը միջազգային շուկաներում կանանց և երիտասարդների գործարար կապերի և մրցունակ կարողությունների զարգացման նպատակով: Ցանկացած մանր քայլ, նույնիսկ հասարակ դասավանդումը կամ տեղեկատվության տրամադրումը կարող է համարվել ծրագիր, որը, սակայն, չի ապահովի անհրաժեշտ արդյունքներ: Կամ «իրականացվելու են շուկայական ուսումնասիրություններ՝ թիրախավորելով ներդրումային գրավչության և ծրագրերի մշակման համար առանցքային տեղեկատվության բացահայտումը»: Անհասկանալի է, թե ինչ միջոցներով և ում կողմից է իրականացվելու այս ուսումնասիրությունները, ինչպիսի տեղեկատվություն դրանք պետք է պարունակեն և ինչպես դրանք պետք է նպաստեն ներդրողների կողմից որոշումների կայացման արագացմանը:

Կան այլ դրույթներ ևս, որոնց իրականացումը դեռևս անհասկանալի է: Հույս ունենանք, որ կառավարության 2021-2026 թվականների գործունեության միջոցառումների ծրագիրը կհստակեցնի դրանց իրականացման մոտեցումները:

ԵԶՐԱԿԱՑՈՒԹՅՈՒՆ

Իրականացված վերլուծությունը վկայում է, որ 2017 թվականի կառավարությունը իր գործունեության ընթացքում կարևոր տեղ էր հատկացնում գործարար միջավայրի բարելավմանը: Կառավարությունը հստակ սահմանել էր, թե ինչ քայլեր է ձեռնարկելու, ինչը կարևոր է գործարար համայնքի համար՝ պետական քաղաքականության կանխատեսելիության և ապագա գործունեության պլանավորման տեսանկյունից: Կառավարությունը ձեռնարկել էր նաև բոլոր անհրաժեշտ քայլերը 2017 թվականի պլանավորված աշխատանքները կատարելու նպատակով, ինչը պսակվել է հաջողությամբ:

Նույնը չի կարելի ասել 2019 թվականին ձևավորված կառավարության մասին: Ուսումնասիրությունները ցույց տվեցին, որ այս կառավարությունը աչքի չի ընկել գործարար համայնքի հետ ակտիվ շփումներով և նրանց խնդիրների վերհանումով, նկատվել է նաև փոքր և միջին ձեռնարկատերերի հարցերի նկատմամբ հետաքրքրության բացակայություն: Մի քանի խոշոր գործարարների հետ հանդիպումները բավարար չեն գործարար միջավայրի գնահատման և բարելավման համար: Գործարար միջավայրի բարելավման ուղղությամբ 2019 թվականի կառավարության խոստումների և գործունեության մանրամասն վերլուծությունը, որը հրապարակվել է դեռևս 2019 թվականին դրա վաղ վկայությունն է:

COVID-19-ը և Արցախյան 44-օրյա պատերազմը ավելի բարդացրին գործարար համայնքի կյանքը, իսկ կառավարության ծրագրերը և գործունեությունը էական դրական ազդեցություն չունեցան գործարար միջավայրի բարելավման հարցում:

Ճիշտ է, այսօր կառավարության որոշ ներկայացուցիչներ փորձում են գործարար համայնքի հետ շփումների միջոցով հասկանալ նրանց խնդիրները և դրանց լուծման ուղիները, սակայն, հիմք ընդունելով նախկին դառը փորձը և նախկին կառավարության (որի անդամների որոշ մասը շարունակում է գործել նաև այսօր) գործունեության դանդաղկոտությունը, խոստումների իրականացման նկատմամբ անտարբերությունը, կարծում ենք, որ դեռևս լուրջ զարգացումներ գործարար միջավայրի բարելավման առումով չի կարելի ակնկալել:

ԱՄՓՈՓՈՒՄ

1. 2017 թվականին ՀՀ կառավարությունն ամբողջությամբ իրականացրել է գործարար միջավայրի բարելավման ուղղությամբ իր ծրագրով նախատեսված գործողությունները:
2. 2019 թվականին ընտրված կառավարությունը իր գործունեության ընթացքում չի ապահովել միջազգայնորեն ընդունված ինդեքսներում, մասնավորապես «Գործարարությամբ զբաղվելը» ինդեքսում Հայաստանի առաջընթացը:
3. 2019 թվականին ընտրված կառավարությունը չի իրականացրել սնանկության գործընթացներին առնչվող խոստացված օրենսդրական և ինստիտուցիոնալ փոփոխությունները:
4. Փոքր և միջին ձեռնարկատիրության զարգացման խորհրդի նիստը, որը կարևոր է ՓՄՁ և ձեռնարկատիրության ոլորտում ծագած հարցերի քննարկման և կարգավորման համար, կայացել է միայն 2021 թվականի փետրվարին՝ վերջին նիստից (2017 թվականի հուլիս) մոտ երեք տարի անց:
5. 2021 թվականին ընտրված կառավարության ծրագրային որոշ դրույթներ անհասկանալի են և հետևաբար՝ անչափելի: Չկան հստակ արդյունքներ, իսկ նախատեսված քայլերը շատ ընդհանրական են ձևակերպված: Հետևաբար, այսօրվա դրությամբ, գործարար միջավայրի բարելավման առումով լուրջ զարգացումներ չի կարելի ակնկալել:

ՄԱՍ II. ՓՄՁ ՈԼՈՐՏԻ ԶԱՐԳԱՅՈՒՄ

ՀՀ կառավարության ծրագիր 2017-2022թթ.	ՀՀ կառավարության ծրագիր 2019-2024թթ.	ՀՀ կառավարության ծրագիր 2021-2026թթ.
3. Փոքր և միջին ձեռնարկատիրության աջակցության և զարգացման նպատակով ՀՀ կառավարությունը նախատեսում է՝ • մինչև 2018 թվականի ավարտը ձևավորել ՓՄՁ-ի ոլորտի վիճակագրական տվյալների հավաքագրման և մշակման	• Կաջակցվեն «զրոյից» բիզնես ստեղծելու ձգտում ունեցող քաղաքացիների հմտությունների զարգացումը և նրանց ծրագրերի իրագործումը՝ գործնական միջանցք ապահովելով նոր գործարար նախաձեռնությունների իրականացման համար: Այդ նպատակով կհամագործակցենք ՓՄՁ-ի հանրության շահերը ներկայացնող հասարակական	• Ընդլայնվելու է սկսնակ ձեռներեցների աջակցության գործիքակազմը՝ նորարար ձեռներեցների համար զգալիորեն բարձրացնելով ֆինանսների, ձեռնարկատիրական հմտությունների ու կապերի, ինչպես նաև գիտելիքի հասանելիությունը: • Ներառական տնտեսության տեսանկյունից ՓՄՁ-ների դերի մեծացման հրամայականից ելնելով՝ կառավարությունը ակտիվորեն աջակցելու է ՓՄՁ-ների զարգացմանը՝ 5 տարիների ընթացքում ՓՄՁ-ների մասնաբաժինը ՀՆԱ-ում հասցնելով 55%-ի: • ՓՄՁ զարգացման համար կառավարության հիմնական քայլերն ուղղվելու են ՀՆԱ-ում ՓՄՁ-ների տեսակարար կշռի աճին և համաչափ

ինստիտուցիոնալ հնարավորությունները և 2019 թվականին հրապարակել վիճակագրական տեղեկատվությունը: մինչև 2018 թվականի ավարտը մշակել և ներդնել ՓՄՁ-ի սուբյեկտների նոր պահանջներին համապատասխան պետական աջակցության նոր գործիքակազմ, այդ թվում՝ խորացնել ՓՄՁ-ի ոլորտում աջակցության ծրագրեր իրականացնող միջազգային կառույցների հետ համագործակցությունը:	կառույցների հետ, մասնավորապես՝ տարածքային ձեռներեցության կենտրոններ ձևավորելու և զարգացնելու միջոցով: - Մինչև 24 մլն դրամ իրացման շրջանառությամբ միկրո ձեռնարկություններն ազատված կլինեն շրջանառության և եկամտային հարկերից, որը բացի սոցիալական կարևոր նշանակությունից, կստանա գործարար փոքր գաղափարները ձեռնարկատիրական մեծ ծրագրերի «տրանսֆորմացնելու» էական նշանակություն: - Կառավարությունը կարևորելու է նաև ՓՄՁ-ի խոշորացման այլ խթանների համակարգի զարգացումը: - Մեծ նշանակություն է տրվելու նաև ՓՄՁ-ի սուբյեկտների համար ֆինանսների հասանելիության բարձրացման ուղղությամբ ծրագրերի իրականացմանը:	տարածքային զարգացմանը: Այդ նպատակով իրականացվելու են հետևյալ աշխատանքները՝ - Ձեռնարկվելու են քայլեր՝ ուղղված ՓՄՁ խրախուսմանը, մասնավորապես ֆինանսական ռեսուրսների հասանելիության բարձրացման ու կարողությունների ձևավորման միջոցով: - Ստեղծվելու է տեխնոլոգիաների և գյուտերի առևտրայնացման կառույց: - Իրականացվելու են միջոցառումներ «Made in Armenia» բրենդի կայացման, մասնավորապես՝ միջազգային շուկաներում հայաստանյան արտադրողների ներկայացվածության և ճանաչելիության աստիճանի բարձրացման ուղղությամբ: Այս նպատակով կառավարությունը հատկապես ուշադրության կենտրոնում է պահելու ՓՄՁ-ների շրջանակում տեղական արտադրանքի միասնական բրենդի մշակումն ու առաջխաղացումն արտաքին շուկաներում: - Մշակվելու է «Արտադրել Հայաստանում» հայեցակարգը՝ խթանելով օտարերկրյա ընկերությունների ներգրավումը: - Ստեղծվելու է սոցիալական նորարարության աջակցության կենտրոն՝ միտված սոցիալական ձեռներեցության և սոցիալական միջավայրի զարգացմանը: - Ներառական աշխատուժի համար վերապատրաստման և վերաորակավորման միջոցով իրականացվելու են սոցիալական համակարգի կատարելագործմանն ուղղված քայլեր: - Տնտեսության տարբեր ոլորտներում ստեղծվելու են կանանց ներգրավման, մասնավորապես աշխատանքը և մայրությունը համատեղելու համար առավել լայն հնարավորություններ: - Ձեռնարկվելու են միջոցներ գյուղերում ոչ գյուղատնտեսական ձեռնարկատիրության խրախուսման ու ոչ գյուղատնտեսական հմտությունների ձեռքբերման համար նպաստավոր պայմանների ստեղծման, մասնավորապես ներկայումս մեծ պահանջարկ ունեցող հմտությունների ձևավորման ու զարգացման ուղղությամբ:
--	---	--

		- o ՓՄՁ զարգացման ոլորտում, մասնավորապես գործառնական լիազորությունների տրամադրմամբ, կառավարությունը նպաստելու է ոլորտային ասոցիացիաների ստեղծմանը, զարգացմանն ու կայացմանը: - o Կրթական համակարգի տարբեր փուլերում ներդրվելու են ձեռնարկատիրական ունակությունների զարգացման դասընթացներ:
--	--	---

ՓՄՁ-ի ոլորտի վիճակագրական տվյալների հավաքագրման և մշակման ինստիտուցիոնալ կարողությունների ձևավորման անհրաժեշտության մասին բազմիցս նշվել է ինչպես տարբեր միջազգային զեկույցներում, այնպես էլ ոլորտի մասնագետների և կառույցների կողմից, ինչն իր արտահայտությունն էր գտել 2017 թվականի կառավարության ծրագրում: Այդ աշխատանքը, սակայն, նախատեսված էր ավարտին հասցնել 2018 թվականի վերջին, ինչը դադարեցվեց 2018 թվականի իշխանափոխությունից հետո: Իշխանափոխությունից հետո ըստ էության դադարեցվեց նաև կառավարության մյուս գործողության իրականացումը՝ ՓՄՁ-ի սուբյեկտների նոր պահանջներին համապատասխան պետական աջակցության նոր գործիքակազմի մշակումը և միջազգային կառույցների հետ համագործակցության խորացումը: Դա պայմանավորված էր Փոքր և միջին ձեռնարկատիրության զարգացման աջակցության կենտրոնում իշխանափոխությունից հետո սկսված փոփոխություններով, ինչը հետագայում հանգեցրեց այդ կենտրոնի վերանվանմանը և գործառույթների փոփոխությանը:

ՀՀ կառավարության 2020 թվականի օգոստոսի 27-ի թիվ 1443-Լ որոշմամբ ընդունվեց «Փոքր և միջին ձեռնարկատիրության զարգացման 2020-2024 թվականների ռազմավարությունը և դրանից բխող 2020-2022 թվականների գործողությունների ծրագիրը»: Այսինքն՝ ավելի քան մեկ տարի 2019 թվականի կառավարությունը չի ունեցել ՓՄՁ ոլորտի զարգացման որևէ ռազմավարական մոտեցում և առաջնորդվել է դեռևս նախորդ կառավարությունների կողմից մշակված գործիքակազմով և ծրագրային մոտեցումներով: Հաշվի առնելով նաև, որ այս կառավարությունը հայտարարել էր «տնտեսական հեղափոխության» և զարգացման նոր տեսլականի մասին, բավականին տարօրինակ է նախորդ կառավարության ռազմավարությամբ գործելը:

Ավելին, 2018-2019 թվականները շրջադարձային էին ՓՄՁ ոլորտի ինստիտուցիոնալ կառույցների գործունեության առումով: Նախ այս ընթացքում նվազել է ՓՄՁ ԶԱԿ-ին (վերանվանված՝ Ներդրումների աջակցության կենտրոնին) ոլորտի զարգացման նպատակով միջազգային և օտարերկրյա դոնոր կազմակերպությունների կողմից տրամադրված աջակցությունը: Այսօր էլ,

Ներդրումների աջակցության կենտրոնի կայքի ուսումնասիրությունը ցույց է տալիս, որ գործող ծրագրերի մեծամասնությունը նախաձեռնվել էին մինչև 2018 թվականը: Իհարկե, 2020 թվականի COVID-19-ով պայմանավորված ՀՀ կառավարության կողմից մշակվեց և ներդրվեց «Կորոնավիրուսի տնտեսական հետևանքների չեզոքացման 19-րդ միջոցառումը», որի նպատակն է «ձեռնարկատիրական գիտելիքների ընդլայնման և ֆինանսների հասանելիության բարձրացման միջոցով նպաստել «զրոյից» բիզնես ստեղծելու ձգտում ունեցող շահառուների ձեռնարկատիրական գաղափարների իրագործմանը և շահառուների գործարար ծրագրերի նորարարական զարգացմանը», սակայն դա չի իրականացվել ՓՄՁ-ի հանրության շահերը ներկայացնող հասարակական կառույցների հետ համագործակցության և տարածքային ձեռներեցության կենտրոններ ձևավորելու միջոցով: Ավելին, 2019 թվականին ՓՄՁ ԶԱԿ-ի մարզային մասնաճյուղերի աշխատողների թվաքանակի կրճատումը՝ 2018թ. 22-ից 2019թ. նվազեցնելով մինչև 10 մարդ, չի տեղավորվում ՓՄՁ-ների աջակցության վերաբերյալ կառավարության խոստումների շրջանակում: Այս համատեքստում անհմաստ է խոսել նաև տարածքային ձեռներեցության կենտրոնների մասին, որոնց ձևավորելու դրույթը մնացել է միայն թղթին գրված դրույթ:

2020 թվականի օգոստոսին ընդունված Փոքր և միջին ձեռնարկատիրության զարգացման 2020-2024 թվականների ռազմավարությունը և դրանից բխող 2020-2022 թվականների գործողությունների ծրագիրը նախատեսում է ՓՄՁ զարգացմանն ուղղված մի շարք գործիքների ներդրում (օրինակ՝ երաշխավորությունների հիմնադրամի դրամագլխի ավելացում, բանկային համակարգի հետ ռիսկերը կիսելու եղանակով ՓՄՁ վարկավորման գործիքի ներդրում, գործող ՓՄՁ-ների նորարարական նախագծերի ֆինանսական աջակցության գործիքի մշակում, գործող ՓՄՁ-ների նորարարական նախագծերի ֆինանսական աջակցության գործիքի ներդրում, «Սկսնակ ձեռնարկատեր» ծրագրի իրականացում և այլն:) Սակայն, ինչպես ներկայացվում է ՀՀ 2020 թվականի պետական բյուջեի կատարման մասին հաշվետվությամբ, ռազմավարությամբ նախատեսված գործիքակազմից կարելի է առանձնացնել միայն «Սկսնակ գործարարներին ֆինանսական աջակցություն» ծրագիրը: Մյուս գործողությունները կատարվել են հիմնականում նախկինից շարունակվող ծրագրերի շրջանակներում: Թերակատարվել են նաև նախատեսված գործարար ուսուցողական, տեղեկատվական, խորհրդատվական, աջակցության աշխատանքները, իսկ ՓՄՁ աջակցության համար նախատեսված ֆինանսական միջոցների միայն 68,7%-ն է օգտագործվել:

2021 թվականի կառավարության ծրագրային դրույթներից մի քանիսն արդեն իսկ առկա են ՓՄՁ զարգացման ռազմավարությունում, սակայն կան դրույթներ, որոնց իրականացումը, կարծում ենք, իրատեսական չէ:

Մասնավորապես, ծրագրով նախատեսվում է միջոցառումների իրականացում «Made in Armenia» բրենդի կայացման, մասնավորապես՝ միջազգային շուկաներում հայաստանյան արտադրողների ներկայացվածության և ճանաչելիության աստիճանի բարձրացման ուղղությամբ, ինչպես նաև ՓՄՁ-ների շրջանակում տեղական արտադրանքի միասնական բրենդի մշակում ու առաջխաղացում արտաքին շուկաներում: Եթե առաջին միջոցառումը տեսականորեն հնարավոր է՝ տարբեր ցուցահանդեսների և համաժողովների կազմակերպման կամ դրանց մասնակցության շնորհիվ (թեև հասկանալի չէ, թե ինչպես է չափվելու ճանաչելիության աստիճանը), ապա անհասկանալի է ՓՄՁ միասնական բրենդի մշակումը և առաջխաղացումը միջազգային շուկայում: Արդյո՞ք դա ենթադրում է «Made in Armenia»-ից բացի այլ բրենդի մշակում: Միթե՞ Հայաստանը նախապատրաստվում է արտաքին շուկայում հանդես գալ երկու բրենդներով՝ տեղական արտադրանք և ՓՄՁ արտադրանք: Այս մոտեցումը խիստ տարօրինակ ցանկություն է և արդեն իսկ ձախողված: Մասնավորապես անհասկանալի է, թե ինչու պետք է լինի ՓՄՁ միասնական բրենդ, որը տարբերվի «Made in Armenia» բրենդից:

Մյուս միջոցառումը, որը կարծում ենք խնդրահարույց է, դա պետության միջամտությունն է ոլորտային ասոցիացիաների ստեղծման գործում: Ասոցիացիաների կամ իրավաբանական անձանց միությունների ձևավորումը ինքնանպատակ չէ: Այդ ոլորտների կազմակերպություններն իրենք են աստիճանաբար հասնում դրանց ձևավորման անհրաժեշտությանը՝ համընդհանուր շահերը պետական և ոչ պետական հատվածում ներկայացնելու և պաշտպանելու նպատակով: Հարկադիր սկզբունքով ձևավորված ասոցիացիաները կամ միությունները չունեն երկար կյանք, քանի որ ձևավորված չեն միասնական խնդիրների և նպատակների շուրջ: Այդ են վկայում Հայաստանում գործող նմանատիպ կառույցների մեծ մասի ներկայիս վիճակը, որոնք ձևավորվել են կա՛մ մեկ անհատի նախաձեռնությամբ, կա՛մ էլ մեկ խնդրի լուծման նպատակով:

Դեռևս անհասկանալի է երկու նոր կառույցների ձևավորման հրամայականը, դրանց իրականացման մոտեցումները և այդ կառույցների գործունեության սկզբունքները: Անհասկանալի է նաև, թե որպես ինչ կառույցի մաս է ստեղծվելու տեխնոլոգիաների և գյուտերի առևտրայնացման կառույցը և սոցիալական նորարարության աջակցության կենտրոնը, արդյո՞ք դրանց աշխատակիցները լինելու են պետական ծառայողներ, թե՞ այդ կառույցների իրավասությունները պատվիրակվելու են մասնավոր կազմակերպությանը, ի՞նչ միջոցների հաշվին են դրանք գործելու, և ի՞նչ նպատակներ ու չափելի ցուցանիշներ են դրվելու այդ կազմակերպությունների աշխատանքային ծրագրերում:

Կարծում ենք՝ նախ անհրաժեշտ է միջոցներ ձեռնարկել երկրում գիտության և գիտահետազոտական կարողությունների զարգացման ուղղությամբ, ստեղծել կամ նպաստել ժամանակակից տեխնոլոգիաներով համալրված գիտահետազոտական

լաբորատորիաների ձևավորմանը, ստեղծել պայմաններ միջազգային չափանիշներին և միջազգային պահանջներին համապատասխանող նորարարական տեխնոլոգիաների մշակման կամ գյուտերի հայտնաբերման և տարածման համար:

ԱՄՓՈՓՈՒՄ

1. 2018 թվականի իշխանափոխությունը կասեցրեց ՓՄՁ ոլորտում 2017 թվականին սկսված վիճակագրական տվյալների հավաքագրման մեխանիզմների և ՓՄՁ աջակցության նոր գործիքակազմի ներդրման քայլերը:
2. ՓՄՁ ոլորտի զարգացման ռազմավարությունն ընդունվել է միայն 2020 թվականի օգոստոսին՝ փաստացի 2018-2019 թվականներին կառավարությունը գործել է նախորդ իշխանությունների կողմից մշակված ռազմավարական ուղղություններով:
3. 2019 թվականին անհասկանալի պատճառաբանությամբ կրճատվեցին ՓՄՁ զարգացման աջակցության կենտրոնի մարզային աշխատակազմը՝ դրանով իսկ զրկելով մարզերի ՓՄՁ-ներին համապատասխան տեղեկատվության և աջակցության մոտեցումների ներկայացումը և տրամադրումը:
4. Տարածքային ձեռներեցության կենտրոնների մասին 2019 թվականի կառավարության խոստումը չի իրականացվել՝ կենտրոններ չեն բացվել:
5. 2020 թվականի բյուջեից ՓՄՁ աջակցության համար նախատեսված ֆինանսական միջոցներից ծախսվել է ընդամենը 68,7%-ը:
6. 2021 թվականին ընտրված կառավարության ծրագրով նախատեսվում է ՓՄՁ միասնական բրենդի մշակում և «Made in Armenia» բրենդի առաջմղում: Փաստորեն կառավարությունը նախատեսում է հայկական ապրանքների համար ունենալ երկու բրենդ, ինչն անիրատեսական է և չարդարացված: Մասնավորապես անհասկանալի է, թե ինչու պետք է լինի ՓՄՁ միասնական բրենդ, որը տարբերվի «Made in Armenia» բրենդից:

Տնտեսական հետազոտությունների և զարգացման աջակցության կենտրոն

(շարունակելի)

«ԼՈՒՅՍ հիմնադրամ» գրառմամբ հրապարակված նյութը պաշտպանված է ՀՀ օրենսդրությամբ և միջազգային համաձայնագրերով: Հրապարակված նյութի բոլոր իրավունքների բացառիկ իրավատերը **«ԼՈՒՅՍ»** հիմնադրամն է:

Նյութի ամբողջական կամ դրանից քաղվածքների վերարտադրումը թույլատրվում է իրականացնել միայն **«ԼՈՒՅՍ հիմնադրամ»** գրառման և համապատասխան **ակտիվ հղման** տեղադրման պայմանով՝ պահպանելով «ԼՈՒՅՍ» հիմնադրամին պատկանող նյութերի օգտագործման կարգը: